

## VIII. IGANDEA URTEAN ZEHAR (A)

### Otoitza

Jainko Jauna, egizu, mundu honek  
zure asmoen neurrian aurrera egin dezala;  
emaiezu herri guztiei egiazko bakea,  
eta Elizari, zure zerbitzu santuan zintzoki irauteko poza.  
Zure Seme Jesu Kristo.

I. IRAKURGAIA: Is 49, 14-15

*Ni ez naiz zutaz ahaztuko.*

Isaias Profetaren liburutik

Sionek esaten zuen:  
«Baztertu egin nau Jaunak;  
ahaztu, nire Jabeak».  
Ahaztu al dezake amak bere bularreko haurra?  
Edota bere sabeleko semea ez maita?  
Hura ahaztuko balitz ere,  
Ni ez naiz zutaz ahaztuko!

ERANTZUN SALMOA: Sal 61, 2-3. 6-7. 8-9

R/. **Nire barrenak**  
**Jainkoagan bakarrik du bere atsedena.**

Nire barrenak Jainkoagan bakarrik atsedena,  
Harengandik nire salbamena.  
Bera bakarrik dut harkaitz eta salbamen,  
nire babes: ez naiteke koloka. R/.

Jainkoagan bakarrik izan ezazu atsedena, ene barrena,  
Harengandik baitatorkit itxaroten dudana.  
Bera bakarrik dut harkaitz eta salbamen,  
nere babes: ez naiteke koloka. R/.

Jainkoagan dauzkat edertasuna eta salbamena,

Jainkoa da nire harkaitz sendo, nire iheslekua.  
 Itxaron ezazu Harengan atergabe, herria,  
 isur ezazue Haren aurrean gogoia,  
 guk ihesleku Jainkoa. R/.

II. IRAKURGAIA: 1 Kor 4, 1-5

*Jaunak agertuko ditu bihotzetako asmoak.*

San Paulo Apostoluak Korintotarrei

Senideok: Gizaki guztiek ikus gaitzatela gu, Kristoren zerbitzari bezala, eta Jaungoikoaren misterioen erabiltzaile. Eta erabiltzaileari hau eskatzen zaio: zintzoa izan dadila.

Niri axola gutxi, zuek nahiz beste edozein giza epailek, ni epaitzea. Ez dut neronek ere neure bururik epaitzen. Egia esan, ez daukat kezkarik neure barruan; baina, hala ere ez dut neure burua garbi jotzen; Jauna dut nik epaile.

Ez dezazuela, beraz, ordua baino lehen epaitu; itxaron, Jauna etorri arte. Hark argituko du ilunbetan dagoena, eta agertuko ditu bihotzetako asmoak; eta orduan jasoko du bakoitzak Jaungoikoarengandik bere saria.

EBANJELIOA: Mt 6, 24-34

**Aleluia:** Heb 4, 12a. d

R/. Aleluia.

V/. Bizia da Jaungoikoaren hitza eta eraginkorra,  
 bihotzaren erabaki eta asmoak  
 epaitzeko gai dena. R/.

*Ez zaitetze kezka biharko egunaz.*

Jesu Kristoren Ebanjelioa San Mateoren liburutik

Aldi hartan, Jesusek honela esan zien bere ikasleei: «Ezin daiteke inor bi nagusiren morroi izan. Izan ere, edota bata gorroto izango du, eta bestea maiteko; edota bati leial izango zaio, eta bestea ez du aintzat hartuko. Ezin zarete izan Jainkoaren eta diruaren morroi.

Horregatik diotsuet: Ez zaitetze kezkatu biziiaz, zer jango; edo gorputzaz, zer jantziko. Bizia ez al da janaria baino gehiago, eta gorputza, jantzia baino gehiago? Begira zeruko hegaztiei: ez dute ereiten, ez igitaitzen, ezta ganbaretan pilatzen ere; eta zeruko zuen Aitak bazkatzen ditu. Ez al z

zuek, haiek baino gehiago?

Eta nor da zuen artean, kezka bezala bere bizitza pixka bat luza dezakeenik?

Eta jantzia, zergatik kezkatzen zarete? Begira landako liliei, nola hazten diren; ez dira lanean ari, ezta ardatzean ere. Eta benetan diotsuet, Salomon bera ere, bere osperik ederrenean, ez zen jazten horietako bat bezain apain.

Bada, gaur zutik dagoen, eta bihar sutara botako den landako belarra Jaungoikoak honela jazten badu, zenbatez gehiago zuek, sineste gutxiko horiek?

Ez ibil, beraz, kezkatzen, esanez: "Zer jango dugu?", edota "zer edango?", edota "zer jantziko?" Jentilak ibiltzen dira guzti horien bila. Zeruko zuen Aitak badaki, guzti horiek behar dituzuela. Bila ezazue, beraz, lehenengo, Jaungoikoaren erreinua eta haren zuzentasuna; eta beste horiek, gehigarri emango zaizkizue.

Ez zaitezte, bada, kezka biharko egunaz. Biharko egunak ekarriko du bere kezka. Aski du egun bakoitzak bere nekea».

### **Oparigaien gainekoa**

Jainko Jauna, Zuk emana dugu  
guk Zuri eskaintzen dizuguna,  
eta Zuk gure zerbitzu bezala hartzen diguzu;  
egizu, gure irabazirako ematen diguzunak  
betiko saria ekar diezagula.  
Jesu Kristo.

### **Jaunartze ondorengoa**

Zure dohain salbagarriak harturik, Jauna,  
apalik eskatzen dizugu:  
orain janaritzat ematen diguzun sakramentu honek  
betiko bizia irits diezagula.  
Jesu Kristo.